

Boatarde. Ha'u hakarak agradese ita-boot sira hotu ne'ebé ohin mai hamutuk ho ha'u iha serimónia ida-ne'e atu ita rekoñese servisu importante ne'ebé ita-boot sira-nia organizasaun sira halao. Ha'u kontente tanba Embaixada Estadus Unidus bele ajuda liután apoia ita-boot sira-nia esforsus hanesan benefisiárius husi programa Fundu Apoiu Kiik Embaixadora Estadus Unidus nian tinan 2020.

Buat ne'ebé úniku kona-ba Fundu Apoiu Kiik ne'e no razaun ha'u valoriza tebes, tanba fundu ne'e fó ba ita-boot sira, líder komunidade lokál sira no sosiedade sivil, ferramentus hodi fó oportunidade ka responde ba kestaun sira ne'ebé ita-boot sira konsidera espesífiku ba ita-boot sira-nia komunidades.

Iha tinan barak ona, Estadus Unidus Amérika sai ona defensór forte ba sosiedade sivil iha Timor-Leste, liuhusi Fundu Apoiu Kiik ida-ne'e nomós liuhusi ami-nia programa sira seluk hanesan USAID nia projetu sira . Iha loron 4 fulan Jullu, ha'u kontente anunsia USAID nia programa boot liu hodi apoia sosiedade sivil.

Ita-boot sira-nia servisu apoia demokrasia no dezenvolvimentu iha Timor-Leste. Ha'u mós valoriza tebes relasaun ne'ebé ita kria entre Embaixada Estadus Unidus no povu Estadus Unidus, ho komunidade sira iha Timor-Leste laran tomak.

Bainhira ita-boot sira halao ita-boot sira-nia programas, ami espera ita-boot sira fahe informasaun kona-ba ita-boot sira-nia programas ho líder lokál sira no ajuda sira kompreende oportunidades no impaktu husi servisu ne'ebé ita-boot sira halo daudaun.

Ho halo nune'e, ita ajuda hari'i sustentabilidade ba ita-boot sira-nia projetu sira no hadi'ak liután ema barak nia moris. Dala ruma, parte difisil liu husi kualkér projetu maka halibur idea di'ak sira iha terrenu. Ami haree programa Fundu Apoiu Kiik ne'e bele ajuda hasoru dezafiu ne'e. Ita-boot sira-nia susesu hanesan susesu ba ita hotu-hotu.

Agora, ha'u hakarak rekoñese grupus hamutuk lima ohin iha ne'e.

Sira ne'e maka: **Abundant Water, Asia Justice and Rights (AJAR), Associacão Empresarial das Mulheres de Timor-Leste (AEMTL), Coalition for Diversity and Action (CODIVA), no Fundasaun Feto Hadomi Família (FFHF).**

Entre projetu sira halao iha tinan ne'e, ita-boot sira sei fó formasaun ba governu nia funzionáriu sira kona-ba orientasaun seksuál, identidade jéneru, espresaun no karaterística seksuál hodi nune'e bele aumenta sensibilidade no koñesimentu kona-ba komunidade LGBTI iha Timor-Leste; promove feto sira-nia empoderamentu ekonómiku liuhusi atividade iha baze iha RAEOA Oecusse, munisípius Manufahi, no Baucau, no dezenvolve planu negósiu ho feto emprezáriu sira iha Dili; fó formasaun ba líder feto komunidade kona-ba promove uza filtru bee serámiku hodi aumenta asesu ba bee moos seguru; no fó formasaun ba feto no mane iha agrikultura no aumenta sensibilidade kona-ba violénsia kontra feto iha munisípiu Manufahi.

Ikus liu molok ha'u termina, ha'u hakarak fó obrigadu ba Mana Tomasia ba nia lideransa iha programa fundu apoiu ida-ne'e iha Embaixada ne'e, no atu introdús ba ita-boot sira ami-nia Ofisiál Fundu nian, Sandy Snider-Pugh. Sira sei serbisu ho ita-boot sira durante tinan hirak ne'ebé ita-boot sira implementa ita-boot sira-nia projetus. Ha'u enkorja ita-boot sira mantein komunikasaun besik ho sira iha tinan hirak tuirmai.

Ha'u agradese ita-boot sira hotu ba ita-boot sira-nia servisu makaas no kompromisu ne'ebé ita-boot sira hatudu ona ba iha esforsus ida-ne'e. Parabéns ba ita-boot sira hotu!

Obrigada barak!